

KR1M: Menteri tolak cabaran debat Pua
Malaysiakini.com
November 16 ,2011

Menteri Perdagangan Dalam Negeri, Koperasi dan Hal Ehwal Pengguna, Datuk Seri Ismail Sabri Yaakob menolak cabaran Pakatan Rakyat untuk berdebat berhubung kontroversi Kedai Rakyat 1Malaysia (KR1M) yang didakwa menjual produk pada harga lebih tinggi manakala kualitinya pula lebih rendah.

Ismail Sabri berkata cabaran yang dibuat oleh setiausaha publisiti DAP Tony Pua supaya perbincangan itu bakal yang disiarkan menerusi televisyen dibuat dengan niat untuk menggagalkan projek berkenaan dan mencari kesalahan kerajaan.

"Mereka tidak berminat untuk bantu rakyat Mereka mahu kedai 1Malaysia ditutup dan boleh berkata: '... Tengok BN (sama dengan) Barang Naik (inflasi). Dan kerajaan gagal untuk mengekalkan kos hidup yang rendah',

"Jelas dari awal lagi (Pua) berniat jahat, jadi saya tidak berminat. Saya hanya berminat (berdebat) dengan orang-orang yang ikhlas (mahu membantu rakyat)," katanya.

Katanya, adalah lebih produktif jika Pua dan konco-konconya menghubungi kementeriannya dengan penyelesaian dan bukannya mengadakan sidang akhbar harian mengutuk kedai 1Malaysia.

"Kami tidak bertolak ansur dengan kualiti. Jika KR1M buat silap, kami akan meminta mereka untuk memperbetulkannya.

"Apa yang kita tidak mahu adalah fitnah, seperti fitnah terhadap harga (KR1M). Itu tidak betul," kata Ismail Sabri.

Beliau berkata demikian kepada pemberita pada sidang akhbar selepas merasmikan Pergerakan Pengguna Pelajar (GPS) di Universiti Malaya (UM).

Terdahulu, semasa pelancaran itu, beliau berkata bahawa produk KR1M dan makanan kos rendah Menu Rakyat kini boleh didapati di UM.

Copyright © 1999-2007 Mkini Dotcom Sdn. Bhd
<http://www.malaysiakini.com/news/181546>